



CHINESE - JAPANESE LIBRARY  
HARVARD - YENCHING INSTITUTE  
AT HARVARD UNIVERSITY  
NOV 30 1946

T2720.7/6623(6)





明朝小史十五卷

蘆城赤隱呂 瑟輯著

泰昌紀

三字治安策

帝在位。虛懷納諫。御史舒榮都獻三字治安策。二字在廷臣曰虛公。一字在皇上曰嚴。

祖宗朝謚考

帝命儒臣取祖宗朝百官謚法。集爲一書進覽。于是

查以忠字冠者二十六額。

忠僖曰文安伯張軫。天順年謚。廣寧侯劉安。成化  
年謚。都督朱希孝。萬曆年謚。

忠威曰都督僉事程寬。永樂年謚。

忠文曰翰林院侍制王禕。正統年改謚。國子監祭  
酒李時勉。成化年改謚。

忠安曰禮部尚書胡濙。天順年謚。

忠宣曰南戶部尚書黃福。兵部尚書劉大夏。俱成

化年謚。

忠襄曰都督僉事濮英。洪武年謚。泰寧侯陳珪。永

樂年謚。兵部尚書金忠。洪熙中謚。戶部尚書郭

資。宣德年謚。兵部尚書儀銘。景泰初謚。南和侯

方英。天順年謚。按察司副使毛吉。成化中謚。

忠剛曰征西前將軍張達。嘉靖中謚。

忠勇曰都督僉事孫世。洪武年謚。保定侯孟善。永

樂年謚。行軍都督陳亨。永樂初謚。安順侯薛貴。

舊名脫火赤。宣德年謚。副總兵林椿。總兵殷尚  
賓。嘉靖年謚。

忠武曰鄂國公常遇春。洪武年謚。廣寧伯劉榮。永  
樂年謚。都指揮同知張玉。洪熙中改謚。陽武侯  
薛祿。宣德年謚。定襄伯郭登。成化年謚。

忠敏曰都督僉事張廉。宣德年謚。興濟伯楊善。天  
順年謚。

忠愍曰帳前萬戶程國勝。洪武年謚。蘄春侯康鐸。

洪武年謚。右都督徐增壽。永樂初謚。翰林侍讀  
劉球。景泰初謚。西路叅將張世忠。嘉靖中謚。兵  
部員外楊繼盛。隆慶中謚。都督指揮李彬。嘉靖  
年謚。副總兵李梅。嘉靖年謚。左都督李深。嘉靖  
年謚。總兵李淶。隆慶初謚。左都督王治道。隆慶  
初謚。

忠簡曰戶部尚書王佐。成化初追謚。

忠懿曰武進伯朱冕。天順年謚。

忠義曰副使孫興。洪武中謚。

忠毅曰樞密張德勝。洪武中謚。都督僉事王簡。洪

武中謚。左都督方政。永樂初謚。都督周長。永樂

年謚。成陽侯張武。永樂初謚。都督曹隆。永樂年

謚。平鄉伯陳懷。宣德年謚。武安侯鄭亨。宣德年

謚。左都督山雲。正統中謚。左都督武興。景泰年

謚。兵部尚書王驥。天順年謚。

忠介曰左都御史海瑞。萬曆中謚。

忠順曰西寧侯宋晟。永樂年謚。駙馬西寧侯宋瑛。

天順年謚。

忠憲曰豐城侯李賢。成化中謚。

忠壯曰燕山護衛百戶王真。洪武年謚。安平侯李

遠。永樂年謚。成安侯郭亮。洪熙年謚。恭順伯吳

允誠。宣德年謚。右都督冀傑。宣德年謚。永順伯

薛斌。宣德年謚。恭順侯吳瑾。天順中謚。南寧伯

毛勝。天順初謚。叅將宗禮。嘉靖年謚。副總兵趙

傾葵。嘉靖年謚。都指揮僉事郭都。嘉靖年謚。副  
總兵張鏞。嘉靖中謚。

忠敬曰黔國公沐晟。正統年謚。

忠靖曰武進伯朱榮。洪熙年謚。戶部尚書夏元吉。

宣德年謚。

忠定曰燕府長史朱復。永樂年謚。吏部尚書蹇義。

正統年謚。戶部尚書韓文。嘉靖初謚。

忠穆曰廣平侯袁容。宣德年謚。

忠肅曰吏部尚書王翱。成化年謚。兵部尚書鄺楚。

成化初追謚。兵部尚書于謙。弘治年謚。刑部尚

書王用汲。萬曆中謚。

忠節曰南州知州何忠。宣德中謚。刑部尚書吳友

雲。弘治年追謚。副使許逵。嘉靖初謚。太僕寺卿

楊最。隆慶初謚。

忠烈曰中書平章事俞通海。洪武初謚。永康侯徐

忠。永樂年謚。英國公張輔。景泰年謚。副都御史

孫燧嘉靖初謚。

以崇字冠者一額。

崇武曰都督僉事陳清。洪武年謚。

以恭字冠者十六額。

恭僖曰隆平侯張信。正統初追謚。成國公朱輔。嘉

靖初謚。掌太醫院事禮部尚書許紳。嘉靖初謚。

黔國公沐朝輔。嘉靖初謚。興府左長史張景明。

嘉靖年謚。

恭和曰孝肅太后弟慶雲侯周壽。正德初謚。

恭襄曰平江伯陳瑄。宣德年謚。戶部尚書馬昂。成

化年謚。工部右侍郎劉丙。正德中謚。吏部尚書

王瓊。嘉靖中謚。兵部尚書江東。嘉靖末謚。副都

御史范鏞。嘉靖年謚。兵部尚書趙炳龍。隆慶中

謚。兵部尚書許論。隆慶年謚。兵部尚書石茂華。

萬曆年謚。彰武伯楊炳。萬曆中謚。

恭敏曰富陽侯李讓。永樂中謚。刑部侍郎廖莊。成



化年謚。兵部尚書白圭。成化年謚。工部尚書李  
燧。嘉靖年謚。襄成伯李全禮。嘉靖中謚。戶部尚  
書馬森。嘉靖年謚。

恭敏曰泰寧侯陳瀛。天順年謚。御史大理寺丞鍾  
同。成化年謚。廣東左布政陳選。正德末謚。

恭簡曰右都御史朱英。成化年謚。吏部尚書尹旻。  
弘治年謚。右都御史戴珊。正德年謚。兵部尚書  
李鐸。嘉靖初謚。太常寺卿魏校。嘉靖中謚。吏部

侍郎歐陽鐸。嘉靖中謚。南兵部尚書韓邦奇。嘉  
靖末謚。南工部尚書王鈞。嘉靖末謚。南右都御  
史王樵。萬曆年謚。

恭毅曰兵部侍郎墨麟。洪熙年謚。永豐知縣鄧顥。  
景泰年謚。刑部尚書王集。成化年謚。南禮部左  
侍郎章綸。成化年謚。

恭惠曰左都御史楊信民。成化年謚。工部尚書章  
拯。嘉靖中謚。

恭介曰兵部尚書陶琰。嘉靖中謚。刑部左侍郎鄭世威。萬曆年謚。

恭順曰兵部侍郎盧淵。宣德年謚。

恭憲曰章皇后父會昌伯孫惠。天順年改謚。

恭獻曰駙馬都尉曹國公李貞。洪武年謚。

恭靖曰榮國公姚廣孝。永樂初謚。保聖賢順夫人

馮氏。夫鎮撫王忠。永樂中謚。太醫院判蔣用文

洪熙年謚。昭皇后父彭城伯張麟。洪熙年謚。左

副都御史賈銓。成化年謚。戶部尚書李敏。弘治

年謚。英國公張懋。正德末謚。南工部尚書洪遠。嘉

靖中謚。成國公朱希忠。萬曆年謚。南吏部尚書

朱希周。嘉靖年謚。左都御史王璟。嘉靖中謚。

恭定曰戶部尚書年富。天順年謚。左都御史潘恩。

萬曆年謚。

恭肅曰武靖侯趙輔。成化末謚。刑部侍郎段民。成

化年謚。吏部尚書周用。嘉靖中謚。刑部侍郎林

鶚嘉靖中補謚。南吏部尚書張潤。南兵部尚書屠。工部尚書蔣瑤。俱嘉靖末謚。吏部尚書熊浹。隆慶初謚。南刑部右侍郎曾鈞。隆慶中謚。恭節曰左都御史王廷。萬曆中謚。以僖字冠者四額。

僖武曰寧遠伯任禮。成化初追謚。

僖敏曰戶部侍郎王鍾。洪熙年謚。都督吳克勤。景泰年謚。左都御史陳鎰。景泰年謚。修武伯沈榮。

天順年謚。副都御史周季麟。嘉靖中謚。

僖順曰都督僉事吳守義。舊名把敦杭。海山降人。宣德年追謚。右都督紀廣。景泰年謚。胡人忠勇伯蔣信。從天順歸謚。

僖靖曰吏部尚書廖紀。嘉靖中謚。

以思字冠者一額。

思勇曰副總兵黑春。嘉靖年謚。

以威字冠者五額。

威襄曰伏羌伯筆銳。嘉靖年謚。

威勇曰寧晉伯劉聚。成化年謚。

威武曰應城伯孫巖。永樂年謚。

威毅曰安陸侯吳復。洪武年謚。

威靖曰懷柔伯施聚。天順初謚。

以文字冠者二十四額。

文通曰禮部侍郎王一寧。景泰年謚。大理寺少卿

李奎。弘治年謚。南史部尚書錢溥。弘治年謚。禮

部尚書費宗。嘉靖中謚。

文忠曰南禮部尚書王英。天順年改謚。吏部直閣

曹鼐。天順初改謚。大學士張孚敬。嘉靖中謚。太

學士楊廷和。隆慶初謚。大學士張居正。萬曆年

謚。

文恭曰少詹事劉鉉。成化年謚。贊善羅洪先。隆慶

初追謚。南工部左侍郎程文德。隆慶年謚。禮部

尚書萬士和。萬曆年謚。

文僖曰侍讀學士直閣張益。天順年謚。南禮部尚書倪謙。成化年謚。南工部尚書董鉞。弘治年謚。南禮部尚書暴淳。弘治年謚。大學士靳貴。正德末謚。禮部尚書張昇。嘉靖初謚。南禮部尚書黃珣。嘉靖中謚。顧清。嘉靖中謚。南禮部侍郎陳陞。隆慶初謚。吏部侍郎陶大臨。萬曆年謚。南禮部尚書林廷機。萬曆年謚。

文思曰禮部尚書直閣彭華。弘治年謚。

文端曰吏部尚書王直。天順年謚。禮部尚書周經。正德年謚。南吏部尚書吳一鵬。嘉靖中謚。大學士高儀。禮部尚書吳山。大學士陳以勤。俱萬曆年謚。

文安曰禮部尚書鄭賜。洪熙年謚。禮部侍郎直閣劉定之。成化年謚。禮部尚書周洪謨。弘治年謚。南兵部尚書林瀚。正德年謚。南兵部尚書劉龍。北禮部尚書李傑。俱嘉靖年謚。大學士呂本。萬

曆年謚。

文昭曰南兵部尚書蕭維禎。成化年謚。南禮部尚書江瀾。嘉靖年謚。

文和曰大學士劉琦。弘治年謚。戶部直閣尹直。正德年謚。

文康曰兵部尚書苗衷。景泰年謚。大學士萬安。弘治年謚。大學士梁儲。方獻夫。顧鼎臣。李時。俱嘉靖年謚。

文莊曰吏部侍郎葉盛。成化年謚。工部尚書謝一夔。正德年謚。大學士丘濬。弘治年謚。南戶部尚書王鴻儒。正德中謚。南禮部尚書邵寶。北吏部尚書羅欽順。禮部尚書歐陽德。俱嘉靖中謚。禮部尚書江俊。南祭酒鄒守益。俱隆慶年追謚。太學士馬自強。殷士儋。俱萬曆年謚。

文襄曰工部尚書周忱。景泰年謚。大學士席書。楊一清。桂萼。吏部尚書唐龍。俱嘉靖中謚。

文成曰御史中丞誠意伯劉基。正德年追謚。新建伯王守仁。隆慶初追謚。

文榮曰大學士袁煒。嘉靖年謚。

文貞曰大學士楊士奇。正統年謚。徐階。萬曆年謚。

文修曰南吏部右侍郎林文俊。嘉靖中謚。

文敏曰少詹事鄒濟。洪熙年謚。大學士楊榮。正統年謚。吏部尚書姚夔。成化年謚。南禮部侍郎崔

銑。北戶部尚書李廷相。禮部尚書霍韜。吏部侍

郎徐縉。俱嘉靖年謚。大學士余友丁。萬曆年謚。

文愍曰大學士夏言。隆慶中謚。

文簡曰禮部侍郎儀智。刑部侍郎馬京。俱洪熙年

謚。大學士黃淮。正統年謚。禮部尚書劉春。季遜

學。俱正德年謚。禮部尚書毛澄。孫承恩。大學士

毛紀。張璧。許讚。禮部侍郎馬汝驥。南太常寺卿

穆孔暉。俱嘉靖中謚。南兵部尚書湛若水。禮部

侍郎呂柟。工部侍郎何孟春。北吏部侍郎董玘

俱隆慶中謚。大學士呂調陽。萬曆年謚。

文懿曰學士直閣呂原。天順年謚。吏部侍郎楊守  
陳。弘治年謚。南工部尚書劉宣。正德年謚。南禮  
部尚書章懋。大學士翟鑾。南吏部侍郎儲瓘。俱  
嘉靖年謚。禮部左侍郎瞿景淳。隆慶中謚。吏部  
右侍郎諸大綬。禮部尚書羅萬化。大學士趙志  
臯。俱萬曆年謚。

文義曰大學士高穀。成化年謚。

文毅曰大學士商輅。成化年謚。吏部尚書倪岳。  
治年謚。禮部尚書傅珪。修撰羅倫。南工部侍郎  
黃孔昭。俱嘉靖年謚。大學士張治。隆慶中改謚  
大學士張四維。萬曆中謚。

文裕曰禮部尚書白鉞。正德年謚。詹事府詹士陸  
深。嘉靖中謚。少詹事黃佐。隆慶中追謚。

文惠曰翰林學士承旨宋濂。正德中追謚。

文介曰侍讀學士劉儼。天順年謚。大學士石瑤。隆



慶中改謚。

文憲曰大學士彭時。成化年謚。費宏。嘉靖中謚。陳于陞。萬曆年謚。

文靖曰贊善王汝玉。洪熙年謚。大學士金幼孜。宣德年謚。南吏部尚書魏驥。成化年謚。大學士徐溥。弘治年謚。劉健。賈詠。俱嘉靖中謚。嚴訥。萬曆年謚。

文正曰大學士李東陽。正德末謚。謝遷。嘉靖中謚。文定曰大學士楊溥。正統年謚。禮部尚書吳寬。弘治年謚。南禮部侍郎王瓚。兵部尚書張邦奇。南祭酒陳敬宗。俱嘉靖年謚。大學士蔣冕。吏部侍郎王道。南京右都御史何塘。俱隆慶中謚。大學士李春芳。萬曆年謚。

又穆曰大學士胡廣。永樂年謚。劉吉。弘治年謚。禮部尚書傅瀚。弘治年謚。大學士許國。萬曆年謚。文肅曰右贊善徐善述。洪熙年謚。禮部侍郎錢習

禮。天順年謚。南禮部尚書王傑。弘治年謚。刑部尚書何喬新。禮部侍郎謝鐸。南禮部尚書吳儼。俱正德年謚。大學士劉忠。南吏部侍郎羅玘。修撰歷知府岳正。俱嘉靖年謚。南禮部侍郎劉瑞。隆慶年謚。大學士趙貞吉。萬曆年謚。

文達曰大學士李賢。成化年謚。

文節曰修撰舒芬。萬曆年謚。

文恪曰南副都御史吳訥。吏部尚書耿裕。俱弘治

年謚。祭酒宋訥。大學士朱善。俱正德年謚。南禮

部尚書楊濂。孫陞。祭酒魯鐸。北禮部尚書溫仁

和。大學士王鏊。俱嘉靖年謚。吏部侍郎丁士美。

周子美。南禮部尚書林濂。俱萬曆年謚。

以端字冠者五額

端敏曰兵部尚書胡世寧。南兵部尚書秦金。俱嘉

靖年謚。

端愍曰兵部侍郎商大節。隆慶初追謚。

端簡曰刑部尚書鄭曉。副都御史朱裳。俱隆慶年謚。刑部尚書毛愷。南刑部林雲回。俱萬曆年謚。端毅曰吏部尚書王恕。正德中謚。刑部左侍郎劉玉。隆慶初追謚。

端肅曰吏部尚書馬文升。正德年謚。戶部尚書梁材。隆慶中追謚。南兵部尚書劉宗。右都御史顧佐。俱萬曆年謚。

以桓字冠者二額。

桓襄曰永城侯薛顯。洪武年謚。

桓義曰廣西都指揮使王真。洪武中謚。

以安字冠者二額。

安簡曰南禮部尚書王宗彜。正德末謚。

安節曰南吏部尚書袁洪愈。萬曆年謚。

以宣字冠者一額。

宣武曰鞏昌侯郭子興。洪武年謚。

以昭字冠者一額。

昭靖曰西平侯沐英洪武年謚。

以康字冠者十額。

康僖曰刑部尚書陸瑜。弘治年謚。屠勳。太僕寺卿。邵銳。南刑部尚書。周倫。駙馬。蔡震。南戶部尚書。王承裕。崇信伯。費棧。南兵部尚書。李克嗣。俱嘉靖中謚。

康敏曰刑部尚書白昂。弘治年謚。趙鑑。嘉靖中謚。康簡曰工部尚書楊守隨。正德末謚。南工部尚書

崔文奎。刑部侍郎胡紹。俱嘉靖年謚。

康懿曰南禮部尚書陳俊。北工部尚書徐貫。俱弘治年謚。工部尚書林廷楫。嘉靖年謚。

康毅曰兵部尚書王憲。嘉靖中謚。

康惠曰南戶部尚書胡富。北兵部尚書李承勳。刑部尚書楊志學。右都御史周季鳳。俱嘉靖年謚。工部尚書宋禮。萬曆年謚。

康順曰南和伯方壽祥。嘉靖年謚。

康靖曰禮部尚書鄒幹。弘治年謚。宣城伯衛鐔。嘉靖中謚。

康穆曰孝貞皇后父都督同知王鎮。弘治中追謚。以莊字冠者十一額。

莊僖曰刑部尚書韓拜。問新寧伯譚佑。東寧伯焦棟。俱嘉靖中謚。左都御史張永明。隆慶年謚。

莊襄曰安慶侯仇成。洪武年謚。黔國公沐崑。右都御史俞諫。俱嘉靖中謚。

莊武曰豐順伯曹義。天順年謚。襄城侯李瑾。弘治年謚。

莊敏曰平江伯陳豫。南吏部尚書崔恭。北戶部尚書楊鼎。俱成化年謚。刑部尚書林聰。弘治年謚。兵部左侍郎陶諧。隆慶初賜謚。南戶部尚書許誥。嘉靖中謚。

莊愍曰左都御史寇深。天順年謚。贈都督僉事馮恩。嘉靖年謚。

莊簡曰航海侯張赫。洪武中謚。南兵部尚書張懌。  
北工部尚書王復順。成國公朱儀。俱弘治年謚。  
南戶部尚書秦民悅。右都御史熊繡。俱正德年  
謚。戶部尚書鄒文盛。禮部尚書李浩。吏部尚書  
聞淵。俱嘉靖年謚。喬宇。隆慶中追謚。南吏部尚  
書王學夔。北吏部尚書陸光祖。俱萬曆中謚。  
莊懿曰南刑部尚書周瑄。成化年謚。兵部尚書張  
瑩。弘治年謚。工部尚書胡拱辰。北刑部尚書閔  
珪。兵部尚書王竑。俱正德年謚。

莊裕曰南戶部尚書徐問。隆慶初追謚。

莊靖曰衛聖夫人楊氏。夫保昌伯蔣廷圭。洪熙年  
謚。大學士陳文。成化年謚。魏國公徐輔。正德末  
謚。工部尚書趙璜。左都御史宋景。俱嘉靖中謚。  
莊肅曰敬皇后父壽寧侯張巒。弘治中謚。副都御  
史婁志德。俱隆慶中謚。

以襄字冠者十額

襄榮曰修武伯沈清。正統年謚。

襄武曰信國公湯和。都督僉事於頭。俱洪武中謚。  
左都督馬斌。正統年謚。

襄敏曰都督臨漳伯郭義。學士曾榮。俱宣德年謚。  
禮部侍郎直閣馬愉。刑部侍郎楊泰。太醫院判  
袁寶。俱正統中謚。工部侍郎王永和。副都御史  
鄧榮。俱景泰年謚。南禮部侍郎許彬。天順年謚。  
刑部尚書董芳。戶部尚書翁世賢。南戶部尚書

黃鎬。南兵部尚書原傑。左都御史李賓。太常寺  
卿學士孫賢。王獻。林文。俱成化年謚。兵部尚書  
威寧伯王越。左都御史鄧廷瓚。俱弘治年謚。南  
戶部尚書周金。左副都御史唐澤。兵部侍郎張  
珩。尚書王以旂。俱嘉靖年謚。南兵部尚書李燧  
隆慶年謚。兵部尚書譚綸。萬曆年謚。翁萬達。隆  
慶中追謚。

襄愍曰安遠侯柳昇。宣德年謚。刑部侍郎丁鉉。景

泰年謚。總制尚書才寬。都督僉事馮禎。俱正德  
年謚。兵部侍郎曾銑。隆慶初追謚。

襄簡曰六安侯王志。洪武年謚。兵部尚書王軾。刑  
部尚書高友璣。俱嘉靖中謚。

襄毅曰靖海侯吳楨。洪武年謚。會寧伯李英。宣德  
年謚。永寧伯譚廣。正統年謚。都督僉事李英。景  
泰年謚。東寧伯焦禮。天順年謚。南兵部尚書程  
信。吏部尚書李秉。俱成化年謚。兵部尚書項忠。

弘治年謚。右都御史韓雍。戶部尚書秦鉉。俱正  
德年謚。吏部尚書許進。兩廣右都御史潘鑑。兵  
部尚書王邦瑞。俱嘉靖中謚。兵部尚書彭澤。隆  
慶初追謚。吏部尚書楊博。萬曆中謚。

襄惠曰吏部尚書屠鏞。弘治年謚。刑部尚書洪鍾。  
右都御史張岳。戶部侍郎鄒守愚。俱嘉靖年謚。  
襄靖曰濟寧侯顧時。洪武年謚。保定侯梁瑤。成化  
初謚。



襄烈曰江陰侯吳良。洪武年謚。

襄恪曰鎮遠侯顧溥。弘治年謚。

以剛字冠者二額。

剛勇曰都督僉事張欽。永樂年謚。

剛毅曰豐城侯李彬。永樂年謚。

以清字冠者四額。

清思曰南工部尚書吳廷舉。隆慶初謚。

清愍曰副都御史孫繼魯。隆慶初追謚。

清簡曰南刑部尚書樊瑩。正德年謚。南吏部尚書

孫需。嘉靖年謚。北吏部尚書孫鏞。萬曆年謚。

清惠曰南刑部尚書耿九疇。成化年謚。北工部尚

書劉麟。嘉靖末謚。

以貞字冠者二額。

貞襄曰南兵部尚書徐錡。景泰年謚。北兵部叅豹。

隆慶初追謚。

貞肅曰刑部尚書林俊。隆慶初追謚。

以榮字冠者十三額。

榮恭曰駙馬都尉崔元。嘉靖年謚。

榮僖曰新建伯李玉。正統年謚。孝肅太后弟長寧伯周或。正德年謚。獻皇后弟玉田伯蔣輪。睿皇后從孫安昌伯錢承宗。定國公徐光祚。禮部尚書顧可學。戶部尚書孫交。孝潔皇后父泰和伯陳萬言。俱嘉靖年謚。鎮遠侯顧寰。隆慶中謚。

榮懷曰遂安伯陳垣。天順年謚。

榮和曰孝惠太后父昌化伯邵善。吏部尚書汪鉉。英國公張裔。俱嘉靖年謚。

榮康曰黔國公沐武。景泰年謚。成國公朱鳳。嘉靖中謚。

榮襄曰工部尚書吳中。都督韓僖。俱正統中謚。戶部尚書金濂。景泰年謚。章皇后兄會昌侯孫繼宗。成化年謚。大學士袁宗臯。刑部尚書聶賢。俱嘉靖年謚。

榮愍曰駙馬都尉井源。天順年謚。

榮簡曰禮部尚書盛端明。嘉靖年謚。駙馬鄔景和。

隆慶中謚。

榮毅曰招遠流伯馬亮。正統年謚。

榮愿曰刑部尚書朱濬。洪熙年謚。

榮壯曰都督冉保。正統年謚。順義伯羅秉忠。成化

年謚。

榮靖曰右都督陳政。正統年謚。孝肅太后父慶雲

伯周能。成化年謚。孝貞皇后弟瑞安侯王源。鎮

遠侯顧士隆。孝烈皇后父安平侯方銳。南刑部

尚書翁溥。孝靜皇后父慶陽伯夏儒。俱嘉靖中

謚。

榮定曰駙馬都尉梅殷。永樂年謚。

以勇字冠者一額。

勇襄曰雄武侯周武。洪武中謚。太平侯張軌。天順

年謚。

以武字冠者十六額。

武僖曰阜城伯王貴。天順中謚。右都督周玉。黔國公沐琮。俱弘治年謚。

武桓曰樞密趙德勝。洪武年謚。

武莊曰元帥耿再成。廣德侯華高。俱洪武年謚。撫寧侯朱麒。嘉靖中謚。

武襄曰都督同知康茂才。行中書省叅知政事蔡遷。俱洪武中謚。武定侯郭英。都督同知朱崇。俱

永樂年謚。左都督沐昂。正統年謚。昌平侯楊洪。景泰中謚。興安伯徐享。天順年謚。撫寧伯朱謙。成化中謚。豐城侯李旻。安遠侯李珣。平江伯陳圭。都督同知劉文。都督王効。俱嘉靖中謚。左都督周尚文。隆慶年追謚。

武寧曰魏國公徐達。洪武年謚。

武勇曰定西侯蔣貴。正統年謚。伏羌伯毛忠。成化中謚。

武敏曰靖安伯和勇。懷寧侯孫鏗。俱成化年謚。都督同知安國。正德未謚。

武愍曰樞密廖永安。洪武中謚。成國公朱勇。天順年謚。元帥孫興祖。洪武年謚。

武毅曰宣德侯金朝興。洪武中謚。武城侯王聰。鎮遠侯顧成。俱永樂年謚。都督高成。宣德年謚。永順伯薛綬。天順年謚。彰武伯楊信。都督陶瑾。俱成化年謚。保國公朱永。弘治年謚。

武惠曰左都督陸炳。嘉靖末謚。

武順曰衛國公鄧愈。洪武年謚。

武信曰營陽侯楊璟。洪武年謚。武平侯陳友。成化年謚。

武壯曰江南分省叅政胡大海。洪武初謚。左都督梁震。嘉靖中謚。

武靖曰曹國公李文忠。洪武年謚。寧陽侯陳懋。天順初謚。

武肅曰指揮使潘毅。都督僉事高顯。俱洪武中謚。  
安遠侯柳溥。天順年謚。

武烈曰成國公朱能。永樂年謚。

以敏字冠者三額。

敏毅曰定西侯蔣瓌。成化末謚。

敏靖曰黔國公沐紹勛。嘉靖中謚。

敏肅曰工部侍郎陳壽。洪熙年謚。

以隱字冠者一額。

隱懷曰都督同知郤永。嘉靖中謚。

以簡字冠者二額。

簡襄曰南刑部尚書陳壽。萬曆年謚。

簡肅曰左都御史張敷華。正德年謚。周延屠喬。南

工部尚書黃珂。南刑部尚書方良。俱嘉靖年謚。

南兵部尚書潘潢。隆慶年謚。戶部尚書方純。南

刑部尚書孫植。左都御史陳瓚。刑部尚書丘樞。

工部尚書衷貞吉。俱萬曆年謚。

以景字冠者一額。

景成曰燕府左傅丘廣。洪武中謚。

以懿字冠者一額。

懿簡曰兵部尚書張鵬。弘治年謚。

以毅字冠者三額。

毅勇曰都督僉事李桂。嘉靖年謚。

毅敏曰左都督劉玉。成化年謚。

毅愍曰南京糧儲副都御史馬炳龍。正德年謚。大

學士王文。弘治年謚。

以惠字冠者二額。

惠安曰刑部尚書彭韶。弘治年謚。

惠襄曰西平侯沐春。宣德年謚。

以介字冠者一額。

介肅曰南吏部尚書吳嶽。萬曆年謚。

以孝字冠者一額。

孝勇曰都督僉事陳文。洪武年謚。

以悼字冠者一額。

悼僖曰襄城侯李珍。天順年謚。

以壯字冠者七額。

壯勇曰清平侯吳成。都督梁來。左都督馬聚。俱宣

德年謚。恭順侯吳克忠。都督梁成。俱景泰年謚。

宣城伯衛穎。弘治中謚。

壯武曰右都督馬榮。永樂年謚。

壯敏曰昌寧伯趙勝。成化年謚。

壯愍曰都督同知岳懋。嘉靖年謚。

壯毅曰都督僉事何德。臨江侯趙馘。俱洪武中謚。

南寧伯毛福壽。天順年謚。

壯靖曰右都督高文。正統年謚。

壯節曰都督指揮使譚淵。永樂年謚。

以靖字冠者一額。

靖襄曰左都督蕭綬。正統年謚。京營總兵張偉。嘉

靖中謚。



以定字冠者一額。

定襄曰臨江侯陳德。洪武年謚。

以肅字冠者二額。

肅敏曰兵部尚書俞子俊。弘治年謚。

肅愍曰兵部尚書王廷相。隆慶初追謚。

以節字冠者一額。

節愍曰兵部尚書劉雋。洪熙年謚。陳洽。宣德初謚。

江西副使周憲。正德年謚。都指揮。都督同。

知李啓芳。俱嘉靖年謚。

以恪字冠者一額。

恪愍曰贈廉使馮傑。正德年謚。兵部侍郎楊守謙。

隆慶初追謚。

明朝小史十五卷終

明朝小史十六卷

蘆城赤隱呂 恣輯著

天啓記

宗室開科

帝在位。從大學士何宗彥等奏。特著爲宗室開科之令。自列聖以來未有之事也。

鼠怪

三年陝西有鼠怪。鳳縣東關外。飛鼠成羣。在地食穀。

甚速。其狀如捕鷄之狸。自首至尾。約長一丈八尺。濶橫一丈。兩旁肉翅。腹下無足。足在肉翅之四角。爪趾前四後五。毛細軟深長。若鹿之黃黑色。尾甚豐大。人逐之。其去甚速。能飛。特不甚高。

祠宇對聯

帝寵任太監魏忠賢。凡中外臣僚。附之者甚衆。僞旨票本。靡所不爲。京省府州。建立生祠。以爲奉祀香火。每造一處。約費錢糧八千有奇。其門樓殿閣。懸耀星日。京師迎像時。旗上對聯云。至神至聖。中乾坤而立極。多福多壽。同日月以常明。

中旨

魏忠賢黨傾陷正人。必先假借名號。凡有起用。動曰中旨。

二印

帝賜東廠魏忠賢金印一。方二寸。約重百兩。玉筋篆。四爪龍紐。文曰。顧命元臣忠賢之印。盛以金雲龍

匣。又賜客氏一方。文曰欽賜奉聖夫人客氏印。  
雪憤報怨書

三朝要典書。以紅丸挺擊移宮三案編輯而成。皆于  
斥廢殺慘諸臣留一罪案。多出于崔呈秀劉志選  
之意。故黃汝良以爲雪憤報怨之書。

九千九百

太監魏忠賢。舉朝阿諛順指者俱拜爲乾父。行五拜  
三叩頭禮。口呼九千九百歲爺爺。

二十四罪

三年六月初一日都察院左副都御史楊漣謹題爲  
逆璫怙勢作威。專權亂政。欺君藐法。無日無天。大  
負聖恩。大干祖制。懇乞大奮乾斷。立賜究問。以早  
抹宗社事。職惟太祖高皇帝守定律令。內官不許  
干預外事。其在內廷。祇供使令洒掃之役。違者法  
無赦。故在內官。惟以循謹奉法爲賢。聖子神孫相  
守。未敢有改。雖有驕橫恣縱。王振劉瑾其人。旋即

誅戮。故國祚靈長至今。豈意聖明在上。乃敢有肆無忌憚。濁亂朝常。罔上行私。傾害善類。損皇上堯舜之令名。釀宗社無窮之隱禍。如東廠太監魏忠賢其人者。本朝盡爲威劫。無敢指名糾參。職實痛之。職前以兵科給事中親承先帝之命。輔皇上爲堯舜之君。言猶在耳。今若亦畏禍不言。是職自負忠直初心。并負風紀職掌。負皇上起職田間特恩。他日何面目以見先帝于在天。謹撮其大罪之著

者二十四款。爲我皇上陳之。忠賢原一市井無賴人耳。中年爭身。夤入內地。非能通文理。自文書司禮起家者也。皇上念其服役微勞。拔之幽賤。寵以恩禮。原名進忠。改命今名。豈非欲其顧名思義。忠不敢爲奸。賢不敢爲惡哉。乃初猶謬爲小忠小佞。以佞恩。旣乃敢爲大奸大惡。以亂政。祖宗之制。以票擬託重閣臣。非但令其盡心參酌。權無旁分。正使其一力擔承。責無他卸。自忠賢專擅。旨意多出

傳奉。傳奉而真。一字抑揚之間。判若天淵。傳奉而  
僞。誰爲辨之。近乃公然三五成羣。勒逼講讓。政事  
之堂。幾成鬧市。甚至有經自內批。不相照會者。假  
若夜半出片紙殺人。皇上不得知。閣臣不及問。害  
豈渺小。以致閣臣鬱鬱嘆悶。有堅意求去者。壞祖  
宗二百餘年之政體。大罪一也。舊閣臣劉一燝。家  
臣周嘉謨。同受顧命之大臣也。一燝親捧御手首  
定大計。嘉謨倡率百官于松棚下。義斥鄭養性。立

寢后封。以清宮禁。皇上豈遂忘之。忠賢交通孫杰  
論去。急于剪已之忌。不容皇上不改父之臣。大罪  
二也。先帝強年登極。一月賓天。進御進藥之間。普  
天實有隱恨。執春秋討賊之義者。禮臣孫慎行也。  
明萬古綱常之重者。憲臣鄒元標也。忠賢一則逼  
之告病去。一則嗾言官論劾去。至今求南部片席  
不可得。顧于護黨氣。毆聖母者之人。曲意綢繆。復  
加蟒玉以贈其行。是何親于亂賊。何仇于忠義。偏

不容先朝有痛念弓鼎之老臣。大罪三也。王紀鍾羽正先年功在國本。及紀爲司寇。執法如山。羽正爲司空。清修如鶴。忠賢一則使人喧嘩于堂。辱而迫之去。一則與沈淮交構。陷之削籍去。至今請一復職起用不可得。顧于柔媚善附之人。破格黜用。驟加一品以歸。是真與我善者爲善人。與我惡者爲惡人。必不容盛時有正色立朝之直臣。大罪四也。國家最重無如枚卜。忠賢一手握定。力阻前推

之。孫慎行盛以弘更爲他辭以錮其出。豈真欲門生宰相乎。妄預金甌之覆字。竊作貂座之私情。大罪五也。爵人于朝。莫重廷推。去歲南太宰北少宰推皆黜陪。一以蓋枚卜黜陪之案。一以伏借用爲逐之奸。致一時名賢不安俱去。顛倒有常之銓政。掉弄不側之機權。大罪六也。聖政初新。正資忠直。乃滿朝薦文震孟鄭鄮熊德陽江秉謙徐大相毛士龍侯震揚賈繼春等九人。抗論稍忤忠賢。傳奉

盡令降斥。屢經恩典。竟阻賜環。長安謂皇上之怒  
易解。忠賢之怒難饒。大罪七也。然猶曰外廷之臣  
子也。上年皇上南郊之日。傳聞宮中有一貴人。以  
德性貞靜。荷皇上寵注。忠賢恐其露已驕橫狀。謀  
之私比。託言急病。立刻掩殺。是皇上且不能保其  
貴幸矣。大罪八也。猶曰無名封也。裕妃以有喜傳  
封。中外欣欣相告矣。忠賢以抗不附已。屬其私比。  
捏倡無喜。矯旨勅令自盡。不令一見皇上之面。昔

堯以十四月而生。假令當日裕妃幸存。安知不爲  
堯母。是皇上又不能保其妃嬪矣。大罪九也。猶曰  
在妃嬪也。中宮有慶。已經成男。凡在內廷。當如何  
保護。乃繞電流虹之祥。忽化爲飛星墮月之慘。傳  
聞忠賢與奉聖夫人實有謀焉。以皇上麟趾開祥。  
何妨斯男則百。而忠賢包藏禍心若此。是皇上亦  
不能自保其第一子矣。大罪十也。至于先帝之在  
青宮。四十年操心慮患。所與護持孤危。威劫之不



動利誘之不變者。僅王安一人耳。登極一月。堯舜安不可謂無微功。皇上倉卒受命。擁衛防護。安亦不可謂無微忠。即使有罪。亦當聽皇上明正其罪。與天下共見之。而忠賢以私忿矯旨。掩殺于南海子。身首異處。肉飽狗彘。是不但仇王安。而實敢于仇先帝之老奴。與皇上之老犬馬。而略無顧忌也。此後內臣。誰復敢爲忠義者。其餘大小內臣。無罪而擅殺擅逐者。又不知其數千百也。大罪十一也。

因而欲廣願奢。今日討獎賞。明日討祠額。要挾無窮。王言屢褻。近又于河間府毀人居室。起建牌坊。鏤鳳雕龍。干雲插漢。築愁築怨。飲恨吞聲。又不止于坐地擅用朝官。規制僭擬陵寢而已。大罪十二也。今日廕錦衣衛。明日廕中書。金吾之堂。戶皆亂臭。誥勅之館。目不識丁。如魏良弼。魏良材。魏良卿。魏希孔。外甥野子。傅應星等。五侯七貴。何以加茲。不知忠賢有何軍功。有何相業。亦甚褻朝廷之名。

器矣。大罪十三也。因而手滑膽粗。用立枷之法。以示威。前歲枷死皇親家人數命矣。其枷號家人者。欲扳陷皇親也。其扳陷皇親者。欲動搖三官也。當時若非閣臣力有護持。言官極爲糾正。椒房之威。久興大獄矣。大罪十四也。猶借口禁平人開稅也。良鄉生員章士魁卽有他罪。自有提學。乃以爭煤窰傷其墳脉。託言開鑛而死矣。假令盜長陵一杯土。何以處之。趙高鹿可爲馬。忠賢煤可爲鑛。大罪

十五也。王思敬胡遵道侵占牧地果真。小則付之有司。大則付按學院足矣。而徑拿黑獄。三次拷掠。身無完膚。以皇上右文重道。秋爽幸學。而忠賢草菅士命。使青燐赤碧之氣。先結于璧宮泮藻之間。孔子之神。將無怨恫。大罪十六也。未也。而且明懸監謗之令于臺省矣。科臣周士樸執糾織監一事。原是在工言工。忠賢徑停其陞遷。使吏部不得守其銓除。六官不敢司其封駁。險邪因之以偷換手。

眼那移陞叙。致士樸卒困頓以去。于以成中官之尊大得矣。而聖朝則何可有此名色。大罪十七也未也。而且將開羅織之毒于冠紳矣。北鎮撫臣劉僑不肯殺人媚人。自是在刑慎刑。忠賢以其不善鍛鍊。竟令削籍。明示大明之律令。可以不守。而忠賢之意旨不可不遵。將使羅鉗吉網。然後快心。于以彰忠賢之威焰得矣。而國脉則何可崇此蘊毒大罪十八也。未也。而且示移天翳日之手于絲綸

矣。科臣魏大忠到任。已奉明旨。鴻臚報單。忽傳詰責及科臣回話。臺省交論。又再襲王言。幾成解訓。無論玩弄言官于股掌。而煌煌天語。提起放倒信手任心。令天下後世。視皇上爲何如主。大罪十九也。最可異者。東廠原以察奸細。緝非常。非擾平民也。自忠賢受事。鷄犬不寧。而且直以快恩仇。行傾陷。野子傅應星爲之招搖引納。陳居恭爲之鼓舌搖唇。傅繼教爲之投匭打網。片語違懽。則駕帖立

下。如近日之拿中書汪文言。不從閣票。不會閣知。不理閣救。而應星等造謀告密。猶日夜未已。勢不至與同文之獄。刊黨錮之牌不已者。當年西廠汪直之橫。恐未足語此。大罪二十也。尤可駭者。東酋未靖。內外戒嚴。東廠訪緝何事。前韓宗功潛入長安。打點實往來忠賢司房之家。事露始令避去。假令天不悔禍。宗功奸細事成。一旦虜逼城下。忠賢固爲奴酋首功之主人矣。其發銀七萬兩。更創肅

寧縣新城。誠可作鄱塢深藏。不知九門內外生靈安頓何地。大罪二十一也。更可恨者。王者守在西夷。祖制不蓄內兵。卽四衛之設。倘而不揜。原有深意。忠賢謀同奸相沈澣。創立內操。不但使親戚羽黨交互盤居其中。且安知其無大盜刺客。東虜西夷之人。寄名內相家丁。倘或伺隙謀亂。發于肘腋。智者不及謀。勇者不及拒。識者每爲寒心。忠賢復傾財厚與之交結。昔劉瑾招納匹命。曹吉祥弟姪

傾結達官。忠賢蓋已兼之。不知意欲何爲。大罪二十  
十二也。且皇上亦見近日忠賢進香涿州之景象  
乎。鐵騎之擁簇如雲。蟒玉之追隨耀日。警蹕傳呼。  
清塵墊道。人人以爲駕幸涿州。及其歸也。以輿夫  
爲遲。改駕駟馬。羽幢青蓋。夾護雙遮。則已儼然乘  
輿矣。其間入幕密謀。叩馬獻策者。實繁有徒。忠賢  
此時自視爲何如人。想卽恨在一人下耳。不知更  
作何轉念。恐泰山之神。必陰殛之矣。大罪二十三  
也。皇上更不記前日忠賢走馬大內之氣象乎。籠  
極則驕。恩多成怨。今春忠賢馳馬御前。皇上曾射  
殺其馬。貸忠賢以不死。聖恩已厚。忠賢不自伏罪  
請死。且聞進有傲色。退有怨言。朝夕隄防。介介不  
釋。心腹之人。時時打點。從來亂臣賊子。只爭一念  
放肆。遂至收拾不住。皇上果真有此事。奈何養虎  
兇于肘腋間乎。此又寸辮忠賢。不足盡其辜者。大  
罪二十四也。凡此逆跡。皆得之邸報招案。長安之

共傳共見。非出于風影意度者。忠賢負此二十四  
大罪。懼內廷之發其奸。殺者殺。換者換。左右既畏  
而不敢言。懼外廷之發其奸。逐者逐。錮者錮。外廷  
又皆觀望而不敢言。更有一種無識無骨。苟圖富  
貴之徒。或扳附枝葉。或依託門牆。或密結居停。或  
投誠門客。逢其所喜。挑其所怒。無所不至。內有授  
而外發之。外有呼而內應之。向背忽移。禍福立見  
間或內廷奸狀敗露。又有奉聖客氏爲之彌縫其  
罪戾而遮飾其回邪。故掖廷之內。知有忠賢。不知  
有皇上。都城之內。知有忠賢。不知有皇上。卽大小  
臣工。積重之所移。積勢之所趨。亦不覺其不知有  
皇上。而只知有忠賢。每見中外有緊切當做之事。  
當起用之人。必曰要與內邊說說。或人不得用。事  
不得行。亦只說內邊不肯。宮中府中。大事小事。無  
一不是忠賢專擅。卽章奏之上。反覺皇上爲名。忠  
賢爲實。且如前日忠賢已往涿州矣。一切事情。必

星夜馳請。一切票擬。必忠賢既到。始敢批發。嗟嗟。天顏咫尺之間。不請聖裁。而馳候忠賢。意旨于百里之外。事勢至此。尚知有皇上耶。無皇上耶。有天日耶。無天日耶。天祚聖明。屢行譴告。去年以熒惑守斗告。今年以長日風霾告。又以一日三地震告。而乾清之震尤甚。皆忠賢積陰蔽陽之象。聖明偶不及覺察。反加之恩。而忠賢益愍不畏死。更甚之惡羽翼已成。騎虎難下。太阿倒授。主勢益孤。及今

不爲早治。職不知皇上之宗社何所託。聖躬之安危何所託。三宮九嬪之安危何所託。而如此毒心辣手。膽橫已不能爲下。意棘必不肯容人。卽普天共戴之皇子。元良託重之貴妃。能保時得其懽心而不犯其所忌。職又不知貴妃皇子之安危何所託。萬一少有差池。職卽欲以死報皇上。亦復何及。伏念皇上天縱聰明。春秋鼎盛。生殺予奪。豈不可以自主。何爲受制。么麼小豎。令內外大小俱坐針

擅之上。而惴惴莫必其命耶。職在兵科時。曾叅及進忠名在御前。蓋實有見于忠賢之狼子野心。不可嚮邇。不意聖明斷之不蚤。養成今日。倘復優游姑息。再念其隨侍舊人。客氏又從巧爲營解。不卽加處治。小不忍則亂大謀。臣不能爲皇上策矣。高皇帝洪武十年有內侍以久侍內廷從容言及政事。上卽日斥譴。隨諭羣臣曰。漢唐之禍。雖曰宦官之罪。亦人主信愛之過使然。向使宦者不得典兵

預政。雖欲爲亂。其可得乎。今此宦者雖事朕日久。不可姑息。決朕去之。所以懲將來也。洋洋聖謨。中官言及政事。且懲將來。况忠賢欺君無上。惡積罪盈。豈容當斷不斷。伏乞皇上大奮雷霆。將忠賢面縛至九廟之前。集大小文武勳戚。勅法司逐款嚴詢。考歷朝中官交通內外。擅作威福。違祖宗法。壞朝廷事。失天下心。欺君負恩。事例正法。以快神人公憤。其奉聖夫人客氏。亦并勅令居外。以全恩寵。



母務令其厚毒宮中。其傅應星陳居恭傅繼教并下法司責問然後布告天下。暴其罪狀示君側之惡已除。交結之徑已塞。如此而天意弗回。人心弗悅。內治外安。不新開太平氣象者。請斬職以謝忠賢。職知此言一出。忠賢之黨斷不能容職。朕職不懼也。但得去一忠賢。以不悞皇上堯舜之令名。卽可以報命先帝。可以見二祖十宗之靈。一生忠義之心事。兩朝特達之恩知。于願少酬死且不憾。惟

皇上鑒職一點血誠。卽賜施行。

明朝小史十七卷

蘆城赤隱呂 恣輯著

崇禎紀

信夫子

帝初封爲信王。入繼大統。奸邪爲之一清。四海之內。咸稱之曰信。天子言真可爲天子也。

能作時藝

帝平日篤于讀書。詩文靡不善。及在位時。嘗作四書

時藝示羣臣。因而頒行天下。士子咸誦習焉。

### 梅籃

帝在位時。宮中有女。名阿奇。能以青梅雕剗脫核。鏤以花鳥。纖細可愛。以手擘之。玲瓏如小盒。闔之復爲梅。謂之曰梅籃。

### 雨黃泥丸

七年九月京師雨雹。拾取視之。皆黃泥丸子。如核桃大。破之中有火藥氣。

### 建坊嘉獎

帝之末年。軍餉不繼。頒詔戚臣求助。內監王永祚曹化淳等。有助至五萬三萬者。上卽頒旨嘉獎。建坊其門以風庶僚。

### 各府州錢糧

帝以歷年錢糧。不足以供內外軍需。發該部查實報來。今據冊該

北直隸順天府糧一萬四千零。永平府糧四萬五

千零。保定府糧一萬一千零。河間府糧六萬五千零。真定府糧十一萬七千零。廣平府糧五萬九千零。大名府糧十四萬八千零。延慶州糧三千九百零。保安州糧一千八百石零。

南直隸應天府糧二十萬五千六百石零。鳳陽府糧二十萬五千七百石零。廬州府糧九萬三千九百石零。淮安府糧四十萬二千八百石零。揚州府糧二十四萬六千七百石零。蘇州府糧二

百五十萬二千九百石零。松江府糧九十五萬九千石零。常州府糧七十六萬四千石零。鎮江府糧三十一萬五千石零。徽州府糧二十萬石零。寧國府糧十萬三千三百石零。池州府糧六萬一千九百石零。太平府糧四萬九千石零。安慶府糧一十三萬一千八百石零。廣德州糧一千八百石零。和州糧八千二百石零。滁州糧二千三百石零。徐州糧十四萬八千二百石零。

山東濟南府糧八十五萬一千六百石零。兗州府糧四十五萬三百石零。東昌府糧三十一萬八千五百石零。青州府糧六十七萬零。登州府糧二十三萬六千零。萊州府糧三十二萬三千一百零。

山西太原府糧五十七萬零。平陽府糧一百一十一萬九千石零。大同府糧一十二萬六千石零。潞安府糧二十萬三千八百零。汾州糧十五萬一千零。遼州糧二千六百石零。沁州糧四萬八千二百石零。澤州糧四萬六千六百石零。

陝西西安府糧八十六萬五千石零。鳳翔府糧十九萬石零。漢中府糧三萬石零。平涼府糧一十五萬石零。鞏昌府糧十五萬九千石零。臨洮府糧四萬四千石零。慶陽府糧十三萬石零。延安府糧四十二萬石零。

河南開封府糧七十一萬九千三百石零。歸德府

糧七萬七千六百石零。彰德府糧二十五萬二千石零。衛輝府糧二十四萬五千六百石零。懷慶府糧三十三萬六百石零。河南府糧四十八萬一千二百石零。南陽府糧一十一萬四千四百石零。汝寧府糧十二萬一千七百石零。汝州糧十四萬七千七百石零。

浙江杭州府糧二十三萬四千二百石零。嘉興府糧六十一萬八千石零。湖州府糧四十七萬石

零。寧波府糧十七萬四千四百石零。紹興府糧三十三萬八千九百石零。台州府糧一十二萬五千八百石零。金華府糧一十七萬四千石零。衢州府糧九萬二千二百石零。嚴州府糧一萬一千石零。溫州府糧十萬五千一百石零。處州府糧六萬四千石零。

江西南昌府糧五十萬石零。饒州府糧二十一萬三千石零。廣信府糧十三萬三千石零。南康府

糧七萬石零。九江府糧四萬石零。建昌府糧十萬石零。撫州府糧三十一萬石零。臨江府糧二十三萬石零。吉安府糧四十四萬石零。瑞州府糧二十二萬五千石零。袁州府糧二十三萬石零。贛州府糧七萬石零。南安府糧二萬石零。

湖廣武昌府糧一十六萬三百石零。漢陽府糧七萬五千九百石零。承天府糧二十一萬一千八百石零。襄陽府糧六萬三千七百石零。鄖陽府

糧一萬二千四百石零。德安府糧四萬一千石零。黃州府糧二十五萬二千石零。荊州府糧一十九萬四千石零。岳州府糧一十七萬石零。長沙府糧九萬八千石零。寶慶府糧五萬五千石零。衡州府糧二十二萬四千七百石零。常德府糧六萬九千石零。辰州府糧九萬三千三百石零。永州府糧六萬八千石零。

四川成都府糧一十六萬六千石零。順慶府糧七

萬二千石零。敘州府糧十萬石零。重慶府糧三十五萬石零。夔州府糧二萬石零。馬湖府糧二千石零。潼川州糧三萬石零。眉州糧三萬石零。嘉定州糧四萬石零。邛州糧二萬石。瀘州糧二萬石零。雅州糧八千石零。

福建福州府糧十六萬六千石零。泉州府糧十一萬九千石零。建寧府糧十六萬三千石零。延平府糧八萬六千石零。汀州府糧三萬三千七百

八十石零。興化府糧六萬石零。邵武府糧六萬二千石零。漳州府糧十一萬六千石零。福寧州糧二萬八千五百石零。

廣東廣州府糧三十二萬石零。韶州府糧五萬石零。南雄府糧三萬五千石零。惠州府糧六萬七千石零。肇慶府糧十六萬石零。高州府糧六萬六千石零。廉州府糧二萬六千石零。雷州府糧五萬五千石零。瓊州府糧八萬石零。



廣西桂林府糧十二萬五千石零。柳州府糧五萬二千石零。慶遠府糧一萬四千石零。平樂府糧六萬二千石零。梧州府糧一十萬石零。潯州府糧三萬六千石零。南寧府糧四萬七千石零。太平府糧三千石零。

雲南雲南府糧三萬四千二百石零。大理府糧二萬二千八百石零。臨安府糧一萬六千石零。楚雄府糧八千九百石零。徵江府糧九千八十石

零。景東府糧一萬一千八百石零。廣南府糧一千石零。廣西府糧二千一百七十石零。鎮沅府糧一百石。曲靖軍民府糧三千三百石零。姚安軍民府糧三千六百石。鶴慶軍民府糧四千石零。武定軍民府糧二千五百石零。尋甸軍民府糧三千七百九十石零。麗江軍民府糧二千一百石零。元江軍民府糧一千九百三十石。蒙化府糧四千八百石零。永昌軍民府糧八千三百

石零。

貴州貴陽府糧六千五百石。貴州宣慰使司糧六千八百石。思州府糧八百石零。思南府糧一千八百石零。鎮遠府糧八百石零。石阡府糧八百五十石。銅仁府糧一千一百七十石零。黎平府糧二千六百石零。普安州糧二千八百石零。永寧州糧二千二百石零。鎮寧州糧二千六百石零。安順州糧五千石零。都勻府糧四千九百石零。

諸番國風土

帝嘗以永樂七年命太監鄭和王景弘等統官兵二萬七千餘人。駕海船四十八號。往諸番國。開讀賞賜。得諸國風土貢物。所紀諸景。示羣臣不可不知。祖宗開拓疆宇。夷夏一體之意。初至

占城國。其國臨海。有港曰新州。西抵交趾。北連中國地。海船到彼。其酋長頭戴三山金花冠。身披

竺花手巾。臂腿四腕。俱以金錫。足穿玳瑁履。腰束八寶方帶。如裝金剛狀。乘象。前後擁香兵五百餘。或執鋒刃短鎗。或舞皮牌槌鼓。吹柳殼筒。其部領皆乘馬。出郊迎詔。下象。膝行匍匐感恩。奏貢方物。其國所產巨象犀牛甚多。象牙犀角。廣貨別國。棋楠香在一山所產。其酋長差人禁民不得採取。犯者斷其手。烏木降香。樵採爲薪。天無霜雪。氣候常熱如夏。草木長青。隨花隨結。

煮海爲鹽。禾稻甚薄。國人惟食檳榔。畏萋葉。包蠶殼灰。行住坐臥。不絕于口。不解正朔。但看月生爲初月。晦爲盡。如此十次盈虧爲一歲。晝夜善槌鼓。十更爲法。酋長及民下。非至午不起。非至子不睡。見月則飲酒鼓舞爲樂。酋長所居屋宇宮墻。俱執灰甃。及以堅木雕鑿獸畜之形爲華。外周磚垣。亦有城郭兵甲之防。藥鍬刀標之屬。其部領所居。亦分等第。門高有限。民下編茅。

覆屋。米不腐爛不食。醪不生蛆。不爲美酒。以米  
拌藥丸乾和入甕中封固。如收藏日久。其糟生  
蛆爲佳醞。他日開封。用長節竹榦三四尺者。插  
入糟甕中。或團坐五人。量人入水多寡。輪次吸  
竹引酒。入口三四。再入水。若無味則止。有味留  
封再用。長歲時。採生人膽入酒中。與家人同  
飲。又以浴身謂之通身是膽。尸頭鬢者。本是蠟  
人。但無瞳人。具其婦與家人同寢。夜深飛頭  
而去。食人穢物。飛回復合。其體卽活如舊。若知  
而封固其頭。或移體別處則死矣。人有病者。臨  
糞時遭之。妖氣入腹必死。此婦人亦罕有。民間  
有而不報官者。罪及一家。番人戲之。觸弄其頭。  
必有生灰之恨。男女椎髻。腦後花布纏頭。上穿  
短布衫。腰圍花布手巾。其國無紙筆。以羊皮捉  
萍熏黑。削細竹爲筆。蘸白灰書字。若蚯蚓委曲  
之狀。言語燕鳩。全憑通事傳譯。

賓童龍國。與占城山地相連。有雙澗水澄清。佛書所云舍衛乞食卽此地也。目連所居遺址尚存。人物風土。草木氣候。與占城大同小異。惟喪事能持孝服。設佛而度。歿者擇僻地葬之。婚姻偶合。首首出入。或象或馬。一如占城王。從者前後百餘人。執質讚唱。曰亞曰僕。地產棋楠香象牙。貨用金銀花布之屬。民下編茅覆屋以居。

暹羅國。自占城順風。十晝夜可至。其國山形如玉。峭巘周千里。外山崎嶇。內嶺深邃。田平而沃。稼穡豐熟。氣候常熱。風俗勁悍。尚豪強。侵掠鄰境。削檳榔木爲標。鎗水牛皮爲牌。藥鏃等器。慣習水戰。男女椎髻。白布纏頭。穿長衫。腰束青花手巾。其上下謀議。大小事悉決于婦。其男一聽苟合無序。遇中國男子甚愛之。必致酒飲待。歡歌留宿。婦人多爲尼姑。道士能誦經持齋。服色略似中國。亦造庵觀。能重喪禮。人歿氣絕。必用

水銀灌養其屍。而後擇高阜之地。設佛事葬之。釀秫爲酒。煮海爲鹽。地產羅斛香。大風子。油蘇木。犀角。象牙。翠毛。黃蠟。以貳代錢。每一萬箇。准中統鈔二十貫。貨用青白花磁器。印花布。色絹色段。金銀銅鐵。水銀燒珠。雨傘之屬。其酋感慕天朝。遠惠。嘗遣使獻金葉表文。貢獻方物。

瓜哇國。古名闍婆。自占城順風二十晝夜可至。其國地廣人稠。甲兵爲東洋諸番之雄。舊傳鬼子

魔母。與一罔象。青面紅身。赤髮相合。凡生子百餘。嘗食啖人血肉。佛書所云鬼國。卽此地也。其中人被啖幾盡。忽一日雷震石裂。中坐一人。衆稱異之。遂爲國主。卽領餘衆。驅逐罔象。而除其害。復生齒安業。至今其國之遺文。後書一千三百七十六年。考之肇在漢時。至我大明宣德七年矣。其港口八。去馬頭曰新村。居民環接。編茨樟葉覆屋。輔店連行。爲市買賣。其國富饒珍珠

金銀鴉鵲石猫睛青紅等石。瑁瑪瑙荳蔻華  
葵子花木香青藍無所不有。蓋通商旅最衆也。  
其鸚鵡鸚哥孔雀。能馴言語歌曲。其倒掛。鳥身  
形如雀而羽五色。日間焚好香。則收而藏之羽  
翼間。夜則張尾翼而倒掛以放香。民好兇強。生  
子一歲。便以七首佩之。名曰不刺頭。以金銀象  
牙雕琢爲靶。凡男子老幼貧富皆佩于腰間。若  
有爭鬻。卽拔刃相刺。蓋殺人逃三日而出。卽無  
事矣。男子髻頭裸身。腰圍單布手巾。能飲酗酒。  
重財輕命。婦人亦狀。惟項金珠聯紉帶之。兩耳  
塞茭樟葉圈于竅中。其喪事。凡主翁病歿。婢妾  
輩相對而誓曰。歿則同往。臨殯之日。妻妾奴婢  
皆滿頭簪草花。披五色手巾。隨屍至海邊。或野  
郊。昇屍于沙地。俾衆犬食盡爲好。如食不盡。則  
悲歌號泣。堆柴于旁。衆婦坐其上良久。乃縱火  
燒柴而歿。蓋殉葬之禮也。蘇魯馬益。一地名也。

爲市聚貨。商舶米糧港口。有聚獼猴數百。相傳唐時其家五百餘口。男婦兇惡。忽一日有僧至其家。與吉之事。其僧取水喫之。俱化爲猿猴。止留一老嫗不化。今存舊宅。土人及商者常設飯食。檳榔花菓肉類以祭之。不狀。則禍甚驗也。杜板一村之地名也。海灘有水一泓。甘淡可飲。稱爲聖水。元時使將史弼高興征其國。經月不下。舟中之水糧盡。二將拜天祝曰。奉天伐蠻。若天與我水。卽生。不與卽死。遂插鎗鹽苦海中。其泉隨鎗湧起。水味甘甜。衆軍汲而飲之。乃令曰。天賜助我。可力戰也。兵威由是大振。噉聲奮激。番兵百萬餘衆悉敗走。乘勝長驅。生擒番人。烹而食之。至今稱中國能食人也。遂獲酋長以歸。旣服罪。尋放還。仍封爲瓜哇國王。我明太宗文皇帝遣人賞賜國王王妃及部領村主。咸受天賜。其國主遣使路繹進貢方物。



舊港。古名三佛齊國。自瓜哇順風八晝夜可至。田土甚肥。古云一年種穀。三年生金。言其米穀盛而買金多也。故民富饒。俗器好姪。水戰甚慣。其處水多地少。部領者皆在岸側。屋居之周匝皆僕從住宿。其餘民庶皆于木筏上蓋屋而居。以木椿拴關。或水長則筏浮起不能設也。或欲別居。起椿去之。連屋移徙。不勞財力。今爲瓜哇所轄。風俗與瓜哇大同小異。

重迦羅國。與瓜哇界相接。高山奇秀。內有一石洞。前後三門。可容一二萬人。田穀與瓜哇畧同。氣候常暑。風俗頗淳。男女撮髻。身披單布。長衫圍梢布。手中無酋長。以年高有德者主之。煮海爲鹽。釀秫爲酒。地產羚羊。鸚鵡。木棉。椰子。綿紗。貨用花銀。花絹。其處約去數日水程。曰孫陀羅。琵琶拖。曰丹重。曰員嶠。曰彭里。不事耕種。專向寇掠。與吉陀崎諸國相通。所以商舶少至。

吉里地悶。其國居重迦羅之東。連山茂林。皆檀香樹。無別產焉。馬頭商聚有十二所。有酋長。田肥穀盛。氣候朝熱暮寒。男女斷髮。穿短衫。夜臥不蓋其體。商舶到彼。皆婦女至船交易。人多染疾病。十歿八九。蓋其地瘴氣及其淫污之故也。貨用金銀鐵器磁碗之屬。

滿刺加國。其處舊不稱國。自舊港順風八晝夜可至。其國傍海。山孤人少。受弱于暹羅。每歲輸金四十兩爲稅。田瘠少收。內有山泉流爲溪。于溪中淘沙取錫煎成塊。曰斗錫。每塊重官秤一斤四兩。及織芭蕉心簞。惟以斗錫通市。無他產。氣候朝熱暮寒。男女椎髻。身膚黑漆。間有白者。唐人種也。俗尚淳厚。民淘錫網魚爲業。屋如樓閣。而不鋪板。但用木高低層布。連牀就榻。箕踞而坐。飲食厨側俱在上。貨用青白磁器。五色燒朱色。絹金銀之屬。大明敕賜銀印冠帶袍服。建碑

封爲滿刺加國。暹羅始不敢擾。酋長感慕。挈妻子涉海入朝。貢方物。賞勞之。使歸國。

麻逸凍。其處在交欄山之西南洋海中。山峻地平。夾溪聚村落而居。氣候稍熱。男女椎髻。穿長衫。圍色布。田膏腴。倍收。其國尚節義。婦喪夫則削髮。務面絕食七日。夫死同寢。多有並逝者。七日不食。則親戚勸以飲食。若得甦。終身不再嫁矣。至焚夫日。多赴火。死者。煮海爲鹽。釀蔗爲酒。產木棉。黃蠟。玳瑁。檳榔花布。貨用銅鼎鐵塊五色布絹之屬。

彭坑。其處在暹羅之西。石崖周匝。崎嶇。遠望山平如寨。田沃。米穀豐足。氣候溫。風俗尚怪。刻香木爲人。殺人血祭禱。求福禳災。男女椎髻。繫單裙。富家女子。金圈四五飾于頂髮。常人五色燒珠。穿圈。煮海爲鹽。釀蔗爲酒。地產黃熟香。沉香片。腦花。錫降香。貨用金銀色絹瓜哇布銅鐵器鼓。

板之屬。

東西竺。其山與龍牙門相望。洋海中山形分對。嵯峨。若蓬萊萬丈之間。田瘠不宜稼穡。歲藉諸邦。淡洋米穀以食。氣候不齊。煮海爲鹽。釀柳爲酒。男女斷髮。繫梢布。地產檳榔木棉布蕉心簞。貨用花錫胡椒鐵器之屬。

龍牙門。其處在三佛齊西北。山門相對若龍牙狀。甲通船過。山田瘠。穀米甚薄。氣候常暑。四五月淫雨。男女椎髻。穿短衫。圍梢布。擄掠爲豪。遇番船。則以小舟百數迎敵。若順風。僥倖而脫。否則被其劫殺。舟客于此防之。

龍牙加貌。其地離麻逸。凍順風。三晝夜程。內平而外風。民蟻附而居。氣候常熱。田禾勤熟。風俗淳厚。男女椎髻。圍麻逸凍布。穿短衫。以親戚尊長爲重。一日不見。則攜酒餚問安。煮海爲鹽。釀林爲酒。地產沉香。速香。降香。黃蠟。鶴頂。蜂蜜。砂糖。

貨用印花布。入擦都布。青白花磁器之屬。

九州山。其山與滿刺迦近。產沉香。黃熟香。林木叢生。枝葉茂翠。鄭和等差官兵入山採香。得徑有八九尺。長六七丈者六株。香味清遠。黑花細紋。山人張日吐舌。言我天朝之兵。威力若神。

阿魯國。與九州山相望。自滿刺加順風。三晝夜可至。其風俗氣候。與蘇門答刺大同小異。田瘠。少收。盛種芭蕉椰子爲食。男女裸體。圍梢布。常駕

獨木舟入海捕魚。入山採米。腦香物爲生。各持藥鏃弩防身。地產鶴頂片米糖。腦以售商船。貨用色段色絹磁器燒珠之屬。

淡洋。與阿魯山地連接。去滿刺加三日程。山繞周迴。有港。內通大溪。汪洋千里。奔流出海。清淡味甘。舟人過往。汲之。名曰淡洋。田肥禾盛。米粒尖小。炊飯甚香。地產香。民俗頗淳。氣候常熱。男女椎髻。腰圍梢布。貨用金銀鐵器磁器之屬。

蘇門答刺國。古名須文達那。自滿刺加順風九晝  
夜可至。其國傍海。村落田瘠。少收。胡椒蔓生。延  
蔓附樹枝。葉如扁豆。花間黃白。結椒纒垂如櫻  
櫚子。但粒小耳。番秤一播苛。抵我官秤三百二  
十斤。價銀錢二十個。重銀六兩。金抵納。卽金錢  
也。每二十個。重金五兩二錢。風俗頗淳。民網魚  
爲生。朝駕獨木。刻舟張帆出海。暮則回舟。男子  
髮纏白布。腰圍梢布。婦女椎髻裸體。腰圍色布  
手巾。其瓜茄一種。五年結。小再種。橘柚酸甜之  
菓。常花常結。其有一等瓜皮若荔枝。如瓜大。未  
剖之時甚臭。如爛蒜。剖開如囊。味如酥油。香甜  
可口。煮海爲鹽。釀茭樟子爲酒。貨用青白磁器。  
銅鐵瓜哇布色絹之屬。

花面國王。其國與蘇門答刺隣境。傍南巫里洋。透  
迤山地。田足稻禾。氣候不常。風俗淳厚。男子皆  
少墨刺面爲花獸之狀。獠頭露體。單布圍腰。婦

女圍色布。披手巾。雞髻腦後。地多出牛羊雞鴨。羅布。強不奪弱。上下自耕而食。富不驕貧。不盜。可謂善地矣。地產香味青蓮花。近布那姑兒。一山產硫黃貨用。段帛磁器之屬。其酋感慕恩賜。常貢方物。

龍涎嶼。望之獨峙南巫里洋之中。離蘇門答刺西去一晝夜程。此嶼浮滌海面。波激雲騰。每至春間。羣龍來集于上交戲而遺涎沫。番人拏駕獨

木舟登此嶼。採取而歸。或風波則人俱下海。一手附舟旁。一手揖水而得至岸。其龍涎初若脂膏。黑黃色。頗有魚腥氣。久則成大塊。或大魚腹中刺出若斗大。亦覺魚腥。焚之清香可愛。貨于蘇門答刺之市。官秤一兩。用彼國金錢十二個。一觔。該金錢一百九十二個。准中國銅錢九千個。

翠藍嶼。在龍涎之西北五晝夜程。大小七門門中。

皆可過船。傳聞釋迦佛昔經此山。浴于水。被竊其袈裟。佛誓云。後有穿衣者。必爛其皮肉。由此男女今皆削髮無衣。止用樹葉。紉結而遮前後。米穀亦無。惟下海網魚鰕。及種芭蕉椰子爲食。錫蘭山國。自蘇門答刺。順風十二晝夜。可至其國。地廣人稠。貨物多聚。亞于瓜哇。中有高山參天。山頂產有青美藍石。黃鴉鶻石。青紅室石。每遇大雨。衝流山下。沙中拾取之。其海旁有珠簾沙。

常以網取螺蚌。傾入池中。作爛淘珠。貨之海邊。有一盤石。上印足跡。長三尺許。常有水不乾。稱爲先世釋迦佛從翠藍嶼來登此山。足躡其跡。至今尚存也。下有寺。稱爲釋迦佛涅槃。真身側臥在寺。亦有舍利子在其寢處。氣候常熱。民俗富饒。米穀豐足。地產寶石。真珠。龍涎香。乳香。貨用金錢。銅錢。青花。白磁器。色段。色絹之屬。男女繞頭穿長衫。圍單布。大明詔敕。金銀供器。綵粧。



織金寶幡布施于寺。及建石碑。賞賜國王頭目。其王亞烈苦奈兒。負固不共。謀害舟師。太監鄭和潛備先發制之。使衆銜枚疾走。夜半聞砲。則奮擊而入。生擒其王。歸獻闕下。尋蒙恩宥。歸復舊國。由是西夷畏威懷德。莫不向化矣。

溜山洋國。自錫蘭山別羅里南去。順風七晝夜可至。其山海中天巧。石門有三。遠望如城門。中可過船。溜山有人沙溜。官嶼溜。人不知溜。起來溜。

麻里溪溜。加平年溜。加安都里溜。其八處網捕溜洋大魚。作塊曬乾。以代糧食。男子拳髮。穿短衫。圍梢布。風俗澆強。地產龍涎香。貨用金銀段。帛磁器米穀之屬。其酋長感慕聖恩。常貢方物。大葛蘭國。與都蘭樵相近。厥土黑墳。本宜穀麥。居民懶事耕作。歲賴烏爹之米爲食。商船爲風所阻。不以時到。則波濤激灘。載貨不敢滿。蓋以不可停泊之故也。若過巫里洋。則離重險之難矣。

及有高頭埠沉水羅股石之危。風俗淳厚。男女  
纏頭穿單布長衫。圍色布手巾。地產胡椒椰子  
溜魚檳榔。貨用金錢青白花磁器布段之屬。

小葛蘭國山連赤土。地與柯枝國接境。日中爲市。  
西洋諸國之馬頭也。本國通使大金錢名曰儻。  
伽。每個重八分。小金錢名曰吧喃。四十個准大  
金錢一個。田瘠少收。歲藉榜葛刺國米爲食。氣  
候常熱。風俗小淳。男女多回回喃毗人。地產胡

椒。亞于下里乾。檳榔波羅蜜色布。其木香乳香  
真珠珊瑚酥油孩兒茶梔子花皆自他國來也。  
貨用丁香荳蔻色段麝香金銀銅鐵器鐵線黑  
纓之屬。

柯枝國與錫蘭山對峙。內通古里國界。氣候常熱。  
田瘠少收。村落傍海。風俗頗淳。男女椎髻穿短  
衫。圍單布。又一種曰木瓜。無屋舍。惟穴居巢樹。  
入海捕魚爲業。男女裸體。紉結樹葉或草遮其

前後行人遇人。則遮避道傍。俟過方行。蓋避羞也。地產胡椒甚廣。富家俱置板倉貯之。以售商販。使小金錢名吧喃。貨用色段白絲青花白磁器金銀之屬。其酋長常貢方物。

古里國。自錫蘭山起程順風十晝夜可至。其國當巨海之要。嶼與僧伽密邇。亦西洋諸國之馬頭也。山廣地瘠。麥穀頗足。風俗甚厚。行者讓路道不拾遺。法無刑杖。惟以石灰畫地。乃爲禁令。其

酋富居深山。傍海爲市。聚貨通商。男子穿長衫。頭纏白布。婦女穿短衫。圍色布。兩耳懸帶金牌。絡索數枚。其項上珠珍寶石珊瑚連掛纓絡。臂腕足脛皆金銀鐲。手足指皆金銀鑲寶石戒指。髮堆腦後。容白髮黑。其有一種裸身之人曰木瓜。與柯枝國同。地產胡椒亞于下里。俱有倉廩貯之。以待商販。有薔薇露波羅蜜孩兒茶印花被面手巾。其有珊瑚珍珠乳香木香金箔之類。

皆由別國來。其好馬自西番來。匹價金錢千百。貨用金銀色段青花白磁器燒珠麝香水銀樟腦之屬。酋長常遣使捧金葉表文。貢獻方物。

榜葛刺國。自蘇門答刺順風二十晝夜可至。其國卽西印度之地。西通金剛寶座國。日詔納福兒。乃釋迦得道之所。永樂十三年齋詔敕賞賜國王王妃頭目。其國海口有港口察地。港立抽分之所。其王知我中國寶船到彼。遣部領齋衣服

等禮。人馬千數迎港口。起程十二站。至瑣納兒江。有城池街市。聚貨通商。又差齋禮象馬迎接。再行二十站。至板獨哇。是酋長之居處。城郭甚嚴。街市鋪店。連楹接棟。聚貨百有。其王之舍。皆甃灰甃砌高廣。殿宇平頂。白灰爲之。內門三重。九間長殿。其柱皆黃銅包飾。雕琢花獸。左右長廊。內設明甲馬隊千餘。外列巨漢。明盔明甲。執鋒刃弓矢。威儀壯甚。丹墀左右。設孔雀翎傘蓋。

百數。又置象隊百數于殿前。其王于正殿高座  
嵌八寶箕踞坐其上。劍橫于膝。乃令銀柱杖二  
人。皆穿纏頭。來引道前。五步一呼。至中則止。又  
金柱杖二人。引道如前禮。其五拜迎詔敕。叩頭  
加額。開讀賞受畢。鋪氍毹于殿地。待我天使。宴  
我官兵。禮之甚厚。燔炙牛羊。禁不飲酒。恐亂性  
而失禮。以薔薇露和甘蜜飲之。宴畢。復以金盃  
金繫腰金瓶金盆贈天使。其副使皆以銀盃銀

繫腰銀瓶銀盆贈之。其下官員亦贈以金鈴紉  
紵絲長衣。兵士俱有銀錢。蓋此國富而有禮者  
也。其後躬置金筒金葉表文。差使臣齎捧貢獻  
方物。其國風俗淳厚。男子白布纏頭。穿白布長  
衫。足穿金線羊皮靴。濟濟然有文字者。衆凡交  
易。雖有萬金。價定打手。永無悔改。婦女穿短衫。  
圍色布絲錦。不施脂粉。自狀嬌白。耳垂寶鈿項  
掛纓絡。髻堆腦後。四腕金鐲。手足戒指。其有一

種曰印度。不食牛肉。飲食男女不同處。夫死不  
再嫁。妻死不再娶。若孤寡無倚。一村人家輪流  
養之。不容別村求食。其義氣有足稱者。田沃豐  
足。一歲二收。不用耘耔。隨時自宜。男女勤于耕  
織。果有波羅蜜大如斗。甘甜甚美。菴摩羅香酸  
甚佳。其餘瓜菓蔬菜。牛馬雞羊。鳧鴨海魚之類  
甚廣。通使海貳。准錢市用。地產細布撒哈刺毯  
絨兜羅錦水晶瑪瑙珊瑚珍珠寶石糖蜜酥油  
翠毛各色手巾被面。貨用金銀段絹青花白磁  
器銅鐵麝香銀硃水銀草蓆之屬。

卜刺哇國。自錫蘭山別羅南去二十一晝夜可至。  
其國與木骨都東國接連山地。傍海而居。壘石  
爲城。砌石爲屋。山地無草木。地廣斥鹵。有鹽池。  
但投樹枝于池。良久撈起。結成白鹽。風俗頗淳。  
無田耕種。捕魚爲業。男女拳髮。穿短衫。圍梢布。  
婦女兩耳帶金錢項掛纓絡。惟有葱蒜。無瓜茄。

地產馬哈獸。狀如麝香。獐花福祿。狀如花驢。豹  
麂犀牛。沒藥乳香。龍涎香。象牙。駱駝。貨用金銀  
段絹米豆磁器之屬。其酋長感慕恩賜。進貢方  
物。

竹步國。與木骨都東山地連接。村居寥落。壘石爲  
城。砌石爲屋。風俗亦淳。男女拳髮。男子圍布。婦  
女出則以布兜頭。不露身面。山地黃赤。數年不  
雨。草木不生。絞車深井。網魚爲業。地產獅子金

錢豹駝蹄。雞有六七尺高者。其足如駝蹄。龍涎  
香乳香金珀。貨用土珠段絹金銀磁器胡椒米  
穀之屬。酋長感慕。奉貢方物。

木骨都東國。自小葛蘭順風二十晝夜可至。其國  
瀕海。堆石爲城。壘石爲屋。四五層。厨廁待客俱  
在其上。男子拳髮四垂。腰圍梢布。女人髮盤于  
腦。黃漆光頂。兩耳掛絡索數枚。項帶銀圈。纓絡  
垂胸。出則單布兜遮青紗蔽面。足履皮鞋。山連

地曠黃赤土石。田瘠少收。數年無雨。穿井甚深。絞車以羊皮袋水。風俗嚚頑。操兵習射。其富民附舶。遠通商貨。貧民網捕海魚。晒乾爲食。及餵養駝馬牛羊。地產乳香金錢豹龍涎香。貨用金銀色段檀香米穀磁器色絹之屬。其酋長進貢方物。

阿丹國。自古里國順風二十晝夜可至。其國傍海而居。草木不生。田肥種植粟麥。豐盛壘石爲城。砌羅股石爲屋。三四層高。厨房臥室。皆在其上。風俗頗淳。民下富饒。男女拳髮。穿長衫。婦女出則用青紗蔽面。布帽兜頭。不露形貌。兩耳垂金錢數枚。項掛纓絡。地產羚羊。自胸中至尾垂九塊。名爲九尾羊。千里駱駝。黑色。花驢。駝蹄雞。金錢豹。貨用金銀色段。青白花磁器。檀香胡椒之屬。其酋長躬以方物奉獻。

刺撒國。自古里國順風二十晝夜可至。其國傍海



而居。壘石爲城。連山曠地。草木不生。牛羊駝馬。皆以海魚乾啖之。氣候常熱。田瘠少收。惟有麥耳。數年無雨。鑿井絞車。羊皮袋水。男女拳髮。穿長衫。婦女粧點兜頭。與忽魯謨斯國同。壘石築土爲室。三四層者。其上厨廁臥室待客。其下奴僕居之。地產龍涎香。乳香。千里駱駝。民俗頗淳。喪葬有禮。有事禱于鬼神。其酋長常遣使捧金葉表文。奉貢方物。貨用金銀段絹磁器米穀胡椒檀香之屬。

佐法兒國。自古里國順風二十晝夜可至。其國壘石爲城。砌羅股石爲屋。高三四層若塔狀。厨廁臥室皆在其上。田廣少收。山地黃赤。亦不生草木。民捕海魚晒乾。大者人食。小者餵養牛馬。駝羊。男女拳髮。穿長衫。女人出則以布兜頭。面不令人見。風俗頗淳。地產祖刺法金錢豹駝蹄身乳香龍涎香。貨用金銀檀香米穀胡椒段絹磁

器之屬。其酋長遣使奉貢方物。

忽魯謨斯國。自古里國十晝夜可至。其國傍海而居。聚民爲市。地無草木。牛羊駝馬皆食海魚乾。或言深山中亦有草木。風俗頗淳。壘石爲城。酋長深居。練兵畜馬。田瘠麥廣。穀少。民富。山連五色。皆是鹽也。鑿之。鍤爲盤碟碗器之類。食物就用而不加鹽矣。壘石爲屋。有三四層者。其厨廁臥室。待客之所。俱在上。男子拳髮。穿長衫。善弓

矢。騎射。女子編髮四垂。黃漆其頂。出則布幔兜頭。面用青紅紗布以蔽之。兩耳輪周掛絡索金錢數枚。以青石磨水粧點眼眶唇驗花紋。以爲美飾。頂掛寶石珍珠珊瑚。紉爲纓絡臂腕腿足。皆金銀錫。此富人也。行使金銀錢。地產珍珠寶石金珀龍涎香。撒哈刺梭腹絨毯。貨用金銀青花磁器。五色段絹木香胡椒之屬。其酋長嘗貢獻方物。

天方國。自忽魯謨斯四十晝夜可至。其國乃西海之盡也。有言陸路一年可達中國。其地多廣漠。卽古筠冲之地。名爲西城。風景融和。四時皆春也。田沃稻饒。居民安業。男女穿白長衫。男子削髮。以布纏頭。婦女編髮盤頭。風俗好善。酋長無科擾于民。亦無刑罰。自然淳化。不作盜賊。上下安和。古置禮拜寺。見月初生。其酋長與民皆拜天。號呼稱揚以爲禮。餘無所施。其寺分爲四方。

每方九十間。共三百六十間。皆白玉爲柱。黃甘玉爲地。中有黑石一片方丈餘。曰漢初時天降也。其寺層次高上如塔之狀。每至日落。聚爲夜市。蓋日中熱故也。地產金珀寶石真珠獅子駱駝祖刺法豹麋馬有八尺高者。名爲天馬。貨用金銀段疋色絹青白花磁器鐵鼎鐵銚之屬。其國王臣深感天朝使至。加額頂天。以方物獅子麒麟貢于廷。

誠意秘記

成祖定鼎于燕都。大內有密室。劉誠意留秘記焉。鑄  
鑊甚鋼。相戒非大變不啓。帝在位十六年。邊患孔  
急。欲啓視之。掌印內臣叩頭固諫。不聽。室中惟一  
櫃。發之。得繪圖三軸。第一軸文武百官數千。俱手  
執朝笏。披髮亂走。帝詰問。內臣叩頭云。或恐是官  
多注亂。第二圖繪兵將倒戈棄甲。窮民負襁。逃  
狀。上又問。內臣又叩頭答云。或是軍民背叛也。上  
不覺勃然變色。內臣請止。上必欲再展第三軸。軸  
中像酷肖聖容。身穿白背心。右足跣。左足有襪履。  
披髮中懸。厄運有定。至誠可前知也。

紅閣

帝之崩。縊于後宰門煤山之紅閣。紅閣係上于崩之  
前月命勲衛諸臣演習弓馬。親自御覽之地也。

血詔

帝崩時有御筆血詔云。諸臣誤朕。朕無顏見先帝于

地下。將髮覆面。任賊分裂朕屍。慎勿傷我百姓。

明朝小史十七卷終

明朝小史十八卷

蘆城赤隱呂 恣輯著

弘光紀

龍江浮木

帝以崇禎皇之變。諸臣迎立于南都舊內。工部估工  
修造。忽龍江關湧起梗楠大木數百。適資其用。臣  
民咸以爲天授。

馬蹄金

明朝小史

帝在位。內閣馬士英權勢震耀。仕路爭以賄賂倖進。俱登要津。初猶饋銀。既而銀數太多。不足爲重。爭以黃金投獻。江南金價騰貴。有至十五六兩白銀。始易一兩者。相率號曰馬蹄金。

### 南中復書

閣部史可法復燕京書。其辭曰。南國得接好音。某隨遣使問訊吳大將軍。未敢遽通左右。非委隆誼于草莽也。誠以大夫無私交。春秋之義。今倥偬之際。

忽奉琬琰之章。真不啻從天而降也。諷誦再三。殷殷至意。若以逆賊尚稽天誅。煩貴國憂。某且感且愧。懼左右不察。謂南中臣民。偷安江左。竟忘君父之怨。敬爲大國一詳陳之。我大行皇帝。敬天法祖。勤政愛民。真堯舜之主也。以庸臣悞國。至有三月十九日之事。某待罪南樞。救援無及。師次淮上。凶問遂成。地坼天崩。山枯海泣。嗟乎。人孰無君。至肆某于市朝。以爲泄泄之戒。亦奚足謝先皇帝于地。

下哉。爾時南中臣民哀慟如喪考妣。無不拊膺切齒。欲悉東南之甲立剪兇仇。而二三老臣謂國破君亡。宗社爲重。相與迎立今上。以係中外之心。今上非他神宗之孫。光宗猶子。而大行皇帝之兄也。名正言順。天與人歸。五月朔日。駕臨南都。萬姓夾道歡呼。聲聞數里。羣臣勸進。今上悲不自勝。推讓再三。僅允監國。迨臣民伏闕屢請。始以十五日正位南都。從前鳳集河清。瑞應非一。卽告廟之日。紫

雲如蓋。祝文升霄。萬目共瞻。歡傳盛事。大江湧出楠梓數十萬顆。助修宮殿。是豈非天意也哉。越數日。遂命某視師江北。刻日西征。忽傳我大將吳三桂。借兵貴國。破走逆賊。大國入都。爲我先皇帝后發喪成禮。掃清宮闕。撫輯羣黎。且免薙髮之令。示不忘本朝。此等舉動。振古鑠今。凡爲大明臣子。無不長跪。北望頂禮加額。豈但如明諭所云感恩圖報已乎。謹于八月薄治筐篚。遣使犒師。兼欲請命

鴻裁。連兵西討。是以王師旣發。復次江淮。乃辱明  
誨。引春秋大義。來相詰責。善哉乎推言之。然此又  
爲列國君薨。世子應立。有賊不討。不忍死其君者。  
立說耳。若夫天下共主。身殉社稷。青宮皇子。慘變  
非常。而猶拘牽不卽位之說。坐昧大一統之義。中  
原鼎沸。倉猝出師。將何以維係人心。號召忠義。紫  
陽綱目。踵事春秋。其間特書。如莽移漢祚。光武中  
興。丕廢山陽。昭烈踐祚。懷愍六國。晉元嗣基。徽欽

蒙塵。宋高續統。是皆于國仇未剪之日。亟正位號。  
綱目未嘗斥爲自立。卒以正統與之。甚至如玄宗  
幸蜀。太子卽位靈武。議者疵之。未嘗不許以行權。  
幸其光復舊物也。本朝傳世十六。正統相承。自冠  
帶之族。繼絕存亡。仁恩遐被。貴國昔在先朝。夙膺  
封號。載在盟府。寧不聞乎。今痛心本朝之難。驅除  
亂逆。可謂大義復著春秋矣。昔契丹和宋。止歲輸  
以金縑。回訖助唐。不聞利其土地。况太國篤念世



好。兵以義動。萬代仰瞻。在此一舉。若乃乘我家難。窺我幅幘。爲德不卒。是以義始而以利終。爲賊人所竊笑也。貴國豈其然。往者先帝軫念潢池。不忍盡戮。勦撫互用。貽誤至今。今上天縱英明。刻刻以復仇爲念。廟堂之上。和衷體國。介冑之士。擊楫枕戈。忠義民兵。願爲國歿。竊以爲天殪逆賊。當不越于肘腋矣。語曰。樹德務滋。除惡務盡。今逆賊未服。天誅。謀知捲土西秦。方圖報復。此不獨本朝不共

戴天之仇。抑亦貴國除惡未盡之憂。伏乞堅同仇之誼。全始終之德。合師進討。問罪秦中。共梟逆賊之頭。以洩敷天之憤。則貴國義問。炤耀千秋。本朝圖報。惟力是視。從此兩國世通盟好。傳之無窮。不亦千載一策哉。至于牛耳之盟。則本朝使臣。業已在道。不日抵燕。奉盤盂從事矣。某北望陵廟。無涕可揮。身蹈大戮。罪應萬死。所以不卽謁先帝者。實惟社稷之故。傳曰。竭股肱之力。繼之以忠貞。某處

今日。鞠躬致命。克盡臣節。所以報也。惟大國實昭  
鑒之。

南都公檄

維崇禎十七年四月朔日。南京參贊機務兵部尚書  
史可法等。謹以宗社危情。生民至計。布告普天臣  
子。嘗被今天子十七年之鴻休。託高皇帝三百祀  
之陰騭者。其言曰。竊聞遭時有道。類多以文事之  
盛。而詘武功。遭會非常。正可以國恩之洪。而徵臣

節。故天寶亂而嘗山睢陽之事。香靖康靡而宗澤  
李綱之氣烈。彼皆慝從上作。釁可預知。然且俠骨  
錚錚。與艮嶽之峰。而並厲。義風發發。撥霓裳之奏  
以爭鳴。况休命篤于上天。明德光乎良史。有若本  
朝者乎。力掃腥羶。二祖之廓清。號同盤古。治崇寬  
簡。累朝之熙洽。象擬華胥。邇至今上。特興宏模。益  
備。孝廟之溫恭。儼在世宗之神武。重光當冲齡而  
掃。恭顯之氛。立清官府。于召對而發。龔黃之歎。總

爲編氓以寇起而用兵是虐民者寇也。而兵非得已。以兵興而派餉是糜餉者兵也。而餉非自私。顧猶詔旨勤頒。有再累吾民之語。每遇天災。修省無一。時自逸之心。疏膳布袍。真能以天下之肥而忘已瘦。蠲逋宥罪。不難引一人之過。以就臣名。是宜大業之宏昌。何意諸艱之駢集。理誠莫解。事有可陳。思爲蒼生而得人。上之張羅者誠廣。責以赤心而報主。下之自矢者難言。家家有半間之堂。事事

同小兒之戲。果能功名比曹武惠。詎妨好官之得錢。竟無肝膽似漢淮陰。曾念一人之推食。成俗大都爾爾。賢者亦併悠悠。壅蔽實繁。擔當何狀。圖之不早。病已成于養癰。局尚可爲。勢必窮于滅頂。悲夫。悲夫。虜塵未殄。寇焰旋騰。血濺天潢。烽傳陵寢。秦稱天府。誰能封以一丸。晉有霸圖。無復追其三駕。迺者介馬橫馳。夫畿輔。羽書不絕于殿廷。南北之耗莫通。河山之險盡失。天威不測。極知漢天子

自有神靈。兵勢無嘗。豈得謝太傅。但憑歌嘯。留都  
係四方之率。司馬有九伐之經。義不共天。行將指  
日。克襄大舉。實賴同仇。請無分宦遊。無分家食。或  
世貴如王謝。或最勝若金張。或子虛之以貲起。或  
輓輅之以談興。乃至射策。孝廉。明經。文學。亦往往  
名班。國士。橐爲里雄。合應共抒壯謀。各團義旅。仗  
不需于武庫。糗無壅于郇厨。飛附大軍。力爭一決。  
但羣策直承黃鉞。豈賊運得有白頭。醜類立殲。普

天大醜。此則萬代之所瞻仰。實九廟爲之鑒。臨者  
也。倘策未暇。夫卽戎。必義且先于助餉。多或抵小  
國之賦。少則割中人之家。幸濟危機。何弦高之牛  
足惜。卽非長物。亦曹洪之馬。是求各付有司。轉輸  
留計。此則事彌從便。氣易爲豪。至登壘。巨商。聯田  
富室。若與縉紳並舉。亦自分誼有殊。然使平準法  
行。卽陽翟之雄。豈得居其奇貨。又如虛實。今在。將  
處士之號。未可保其素封。凡稱多算之有餘。總賴

聖恩之無外。欲與共爲義士。多方亦賴同盟。偶值佳緣。毋忘善誘。譬以同舟之誼。但凡在千八百國。疇非王臣。揆諸恤緯之心。決不至二十四城遂無男子。嗚呼。親郊迺雍容之事。唐莊尚有崇韜。出塞本徼侍之圖。漢武乃逢卜式。矧茲何日。敢曰無徒。不唯社稷之憂。卽是身家之算。始賊之巧于爲餌。時亦有優孟之仁。迨我之旣入其樊。莫不嬰地獄之罰。齊姜宋子。相牽而入平康。珠戶綺窗。所過便

成甌脫。來俊臣之刑具。則公卿之被拷者。痛嘗。鄭安上之畫圖。與老弱之受苦者。酷肖。是皆難民所說。足令聽者寒心。夫連歲報陷。如西安太原武昌等處。皆行省也。其中金穴。何止一家。牙籤正不勝紀。若六時之牛酒。不乏。雖八公之艸木。可驅。只坐一慳。遂成胥滿。豈不冤哉。欲圖穩著。須問前車。誠清夜而念上恩。雖何曾之萬錢。有難下咽。更援古以籌時象。豈王衍之三窟。便可藏身。同舟卽一家。

破巢無完卵。可不思之。思之又重思之也哉。法等  
智不足以效謀。憤何辭于卽死。實切執及之願。輒  
通托鉢之呼。人理苟存。我求必應。如或纏情阿堵。  
絕念封疆。睢陽之援竟停。則霽雲抽誓言之矢。荆  
州之粟獨擁。則溫嶠有迴指之旗。封章尚達于北  
辰。奮筆敢駑于南史。是爲過計。亦屬癡衷。見起君  
親。約昭天日。法等無任斫地呼天。捶心瀝血之至

追發大痛疏

草莽孤臣劉宗周泣血謹奏爲追發先帝大痛以伸  
大讐事。嗟乎。國破君亡。何代蔑有。惟是宇宙之所  
以嘗存而不毀者。止此綱常名教。子以之事其父  
臣以之事其君。不可不明于世耳。先帝身殉社稷。  
正命考終。凜然著春秋之大義。燕貽之善。遂遺我  
皇上以中興大業。踐祚伊始。知無刻不以討賊復  
讐爲事。而獨怪廷臣中謀國無能。旬月以來。絕無  
一舉一動。可以慰先帝之靈。撫今追昔。有不能令

人不髮指者。臣請得而追訟之。國難之有勤王也。自己巳以來。四矣。何獨寬于今日。乃賊兵入秦。踰晉。漸逼畿南。京師坐困。遠近洶洶。朕大江以南。宴朕無恙也。而二三督撫。曾不聞遣一人一騎。北進以壯聲援。賊遂得長驅犯闕。坐視君父之危亡。而不之救。如曰。兵不成。餉不成。餉將平。日料理之。謂何。平日既無料理。勢不得不以君父爲孤注。則封疆諸臣之坐誅者一。既而大行之凶聞確矣。數

天痛憤。諸臣奮戈而起。決一戰以贖前愆。又當不俟朝食。而方且仰聲息于南中。爭言固圍之策。卸兵權于關外。首圖定策之功。仍復安坐地方。不移一步。此時總督尚有張國維。親承先帝之命。儘得便宜。率諸撫臣鼓行而前。淮揚上下。早已廓清。勢如破竹。而國維反滯家園。意在卸擔。委君命于草莽。而不顧。他又無暇問已。則封疆諸臣之坐誅者二。夫諸臣不驟言進兵。猶曰事無稟承。迨新朝既

立之後。臣謂第一義必遣北伐之師矣。不狀。而亟馳一介使。賫蠟丸。問道北進。或檄燕中父老。或起塞上夷王。共激讐恥。哭九廟之靈。奉安梓宮。兼訪諸皇子所在的。耗。苟效包胥之義。雖逆賊未始無良心。而諸臣計不出此也。又不狀。而亟起閩帥鄭芝龍。以海師直搗燕都。令九邊督鎮。捲甲銜枚。出其不意。事或可幾。而諸臣又不出此也。紛紛制作。盡屬迂回天假之靈。僅令吳鎮諸道臣一奏燕京。

之捷。將置我南中面目于何地。則舉朝謀國不忠之坐誅者三。而更有難爲解者。先帝旣已升遐。發喪有日矣。頒行喪詔。係何等大典。而遲滯日久。距今月餘。未至臣鄉。在浙如此。遠省可知。時移事換。舛謬錯出。卽成服祇成名色。是先帝終無服于天下也。小功不稅。君子譏之。况三年之通喪乎。則今日典禮諸臣之坐誅者四。至罪廢諸臣。量從昭雪。自應援先帝遺詔而及之。乃廷臣不能仰宣陛下。



德意。一。槩徑用新恩。卽先帝誅璫鐵案。前後詔書  
蒙混。勢必彪虎之類。盡從平反而後已。君父一也。  
三年無改之謂何。嗟乎已矣。先皇帝十七載之憂  
勤。念念可以對皇天而泣后土。一旦身殉社稷。懼  
古今未有之慘。而食報于臣工。乃如此之薄。又何  
怪從逆諸人。纍纍若若。朝君臣而暮寇讐也。昔人  
云。死者可作。生者不愧。仰惟陛下再發哀痛之詔。  
將先皇帝一十七載遺事。大書特書。布告天下。而

